



OPINION PUBLICO

Sabiduria den nos alegria

Skirbi pa Ruthy “Lady Ruth” Vrieswijk-Bergen

NOS ta felicita Aruba cu nos Dia Nacional 18 di Maart 2025. Podise ora e relato aki sali ya e dia grandi aki ta tras di lomba. Ban bek un rato n’e anochi di Poeta di Patria cu a tuma luga den Fort Zoutman. Lady Ruth no por a bay participa personalmente, pa motibo di un kebrante di salud, pero a pidi su amiga colega lider scout e carismatico y elegante Marcia Dirks recita e poema cu Lady Ruth a skirbi titula “*Dushi ponche crema di Aruba*”, mientras cu Marcia mes a participa cu su fantastico poema “*Dos placa di palabra*”.

Nos a wak e competencianan na cas riba television y for di e angulo ey a sinti cu algun poema mas cu otro. Tur ta expresionnan poetico diferente y nos a puntra nos mes ta kico t’e criterianan pa scoge e poema ganado. Un team ta scoge e contenido y e otro team di hurado ta scoge e presentacion, vos, accento, actuacion etc. Y despues ta conta e puntonan hunto? Nos a tende cu hendenan den publico a comenta cu e palabra “Atrobe”, ora e ganado maximo a wordo anuncia. Nada personal contra ningun hende. Por algo cera cu el a bolbe gana? Nos no kier trapa riba tenchi di ningun hende ni e comision organizado ni e huradonan, ni e ganadonan, pero e poema ey y algun otro a cansa mi. Pa ora mi a tende un parti y purba di digest, a sigui un otro parti manera repiticion di e estilo cu ya a gana varios biaha.

Nos a comprende fei un di e personanan cu tawata hurado e anochi aki, pero ya fei algun aña atras, cu ta un competencia pues tur hende, ken cu ta por bin participa cuanto biaha cu e kier. Nos ta pensa, si ba gana 2 of mas biaha caba, sigui participa como un boluntario estilo guest star, bo ta stima Aruba henter aña toch? ya otro poetanan tambe por bin na remarke pa gana maske ta un di e puestonan un biaha. Nos tambe a puntra nos mes na cas “atrobe e mesun persona ta gana?” Ta su estilo so ta bal of otronan no kier tende



poemanan cu berdadnan den nan?

Por ta den forma di protesta pero cu contenido cu ta inspira? Podise tin cu ta den “denial” y no kier wak cos manera nan ta, pero ta prefera di sigui soña? Nos ta para banda di mi dos amiganan lider scout cu ta custumbra di “zet door onder alle omstandigheden”. Pero a cuminsa fada y cansa y ta nos tur sa awor di antemano cu ta un Poeta Patria so ta haya e oportunidad cu su poema pa gana. Enbes di engrandecer e competencianan ta atras e ta bay, a menos cu nan cuminsa propaganda na scolnan secundario pa hobennan bin expresa nan amor pa Aruba, sin sa ni mes kico ta un warawara of un doria. Naaaah, e no ta fun mas.

Huradonan cu no por pone nan mes den e simplicidad amoroso di e poema di varios poeta y ta scoge cada ves p’esun cu mas palabranan cu hopi repiticion of zo? Anto tin cu pasa pa “Poeta di buki di Aruba? Tawata tin e poema fantastico di Marcia Dirks “*Dos placa di palabra*” y di Ariana Koolman Chirino cu tambe a inspira un tremendo bon y bunita poema “*Aruba mi forza*”.

→→→



Tur dos cu un tremendo bunita mensahe cu ta berdad. Nos a sinti cu e dosnan ey lo ta den e top 3, pero nada. atrobe.

Nos a comprende cu e publico no tawata asina grandi, y nos por a wak regalonan bunita wordo entrega n'e huradonan, mientras e poetanan participante ta haya un certificado den un lijshie cu ta habri los kita cay den otro ora bo colg'e den bo gang of den bo studie hoekje. Nos a yega di propone pa duna cada participante un voucher pa dinner for two na un bon restaurant of un weekend stay den un di nos hotelnan, p'e participantenan bini hunto y intercambia di idea y palabranan poetico, como aprecio di berdad pa nan inspiracion unico. Naaah, no cada ken den un camber, pero 4 damas den un camber etc. estilo studententijd ofzo.

Duna mas respet y mas balor na tur Poeta, nos merece despues di ta cargando e competencianan aki ya pa varios aña. Ta competencianan asina ki Atan Lee dfm tawata desea pa pueblo haya tur biaha e mesun ganado? Hopi saai y laf mes! Enfin, mi "dos placa di palabra" encuanto Poeta di Patria. Hasta via mi celular mi a ricibi e palabra "Atrobe?" E mesun atrobe?

Un poema prosa no mester tin 20 mil palabra pa expresa amor, den 10 of 20 por anto miho cu mas profundidad den sentimento expresa. Pakico no invita e ganadonan maximo como "Guest Poets", pues Poetanan invita? Principalmente esnan cu a gana mas cu 2 biaha. Ta manera e Oscarnan na Merca, hahaha, tur ta wordo nomina pa participa pero ta un of dos so ta sigui gana, hahahahah! Aynoooo mi Aruba, bo por miho!!!

Nos tambe ta bay tuma pauze anto, e no ta "fun" mas, pasobra, mi a sinti como Poeta colega pa varios di nan cu a merece sali den e top 3 nan, y no a sali. Mi sa kico ta bebe y come di un poema di un Poeta. Nos ta termina nos relato felicitando e 5 ganadonan di Poeta di Patria 2025, specialmente amigo Dominico Werleman cu a presenta un bunita poema y John Fredy cu a bin cu un super bunita poema atrobe, pero pueblo ta desea un otro Poeta di Patria, nan a fada di e mesun cu su mesun estilo tur ora.

Pabien na tur e fiel participantenan cu nunca a yega na beurt pa luci como Poeta di Patria cu nan bunita poema. Comision lo tin miedo cu sin Jhon Fredy no tin Poeta Patria? No t'e so ta stima su di dos cas Aruba, tur ta stima nan pais Aruba. Enfin, un crenchi locual ta biba den pueblo cu a desea di wak un otro Poeta di Patria cu un otro sorto di poema. Talbes hopi ta biba den un fantasia ainda? No ta un estilo di expresa tin, tin hopi mas! Y Lady Ruth a caba di expresa un disgusto, di un pueblo desapunta den con e cos a bay . . . atrobe!

Nos ta skirbi pa pueblo y nos lo sigui skirbi pa pueblo, no mester di titulo pa wordo stima y aprecia pa nos dushi pueblo, specialmente pa nos grandinan. Na mi amiganan colega Poeta Marcia y Ariana, You are awesome! Boso ta master den boso expresion poetico!

Danki pa a regala Aruba boso bunita poema unico den su estilo! Na pueblo lector: Danki pa lesa y danki p'e comprension, nos no ta "Jaloers"! Not at all! No comprende nos fout nos relato di critica constructivo. Pueblo ta preocupa si e competencianan lo keda existi den futuro.

BREAKFAST LUNCH
JUNGLE Cafe

COME IN WE'RE OPEN

CAYA HARMONIA 1. LOKAAL 2
NOORD (PATRAS CITGO SASAKI)

Designed by **divvoo**

@junglecafe